

西安府志

第二函
八冊

安府志卷第三十一

人物志

唐

唐璿舊唐書字休璟始平人曾祖規爲後周驃騎大將軍
休璟以明經擢第授營府戶曹調露中突厥誘扇奚契丹
同反都督周道務遣休璟將兵擊之斬獲甚衆超拜豐州
司馬永淳中突厥圍豐州都督崔智辯戰歿朝議欲罷豐
州休璟上書曰豐州田疇良美宜耕牧隋季喪亂不能堅
守貞觀之末始募人以實之西方一隅方得寧謐今若廢
棄非國家之利也朝廷從其言垂拱中遷安西副都護會
吐蕃攻破焉耆安息道大總管韋待價失利休璟收其餘

衆以安西土遷西州都督上表請復取四鎮則天遣王孝
傑破吐蕃拔四鎮休璟謀也聖歷中爲司衛卿兼涼州都
督持節隴右諸軍副大使吐蕃大將麴莽布支寇涼州休
璟以數千人往擊大破之築京觀而還擢拜右武威金吾
二衛大將軍休璟諳練邊事自碣石西踰四鎮綿亘萬里
山川要害皆能記之長安中西突厥烏質勒與諸蕃舉兵
相持安西道絕則天令休璟與宰相商度事勢草奏施行
後安西諸州表請兵馬應接程期一如所畫遷夏官尙書
同三品尋以契丹入寇復檢校幽營等州都督兼安東都
護時中宗在春宮將行進啓於天子曰張易之兄弟幸蒙
寵遇數侍禁中縱情失禮非人臣之道惟加防察中宗即

位名拜同中書門下正人尋遷中書令景德二年致仕
和元年薨謚曰忠唐書子圭謚至陳州刺史先擇爲右金
吾衛將軍

蕭鈞唐書蕭瑀傳瑀從子長安人有才譽永徽中累遷諫
議大夫宏文館學士時盧文操跳堞盜庫財高宗以其職
主幹當自盜罪死鈞曰囚罪誠死然恐天下聞謂陛下重
貨輕法任喜怒殺人帝曰眞諫議也詔原死太常工爲宮
人通訊遺詔殺之且附律鈞言禁當有漸雖附律工不應
死帝曰如姬竊符朕以爲戒今不濫工死然喜得忠言卽
宥工徙遠夷終太子率更令子瓘爲渝州長史居母喪以
毀卒鈞兄子嗣業擢累鴻臚卿單于都護府長史

韋宏機唐書萬年人祖元禮隋浙州刺史宏機仕貞觀時累遷殿中監顯慶中爲檀州刺史以邊人陋僻乃修學宮畫孔子七十二子漢晉名儒像敦勸生徒繇是大化擢司農少卿主東都營田苑宦者犯法杖乃奏遷司農卿初東都方士朱欽遂爲武后所寵姦賊狼籍宏機白帝遂欽遂於邊后恨之帝將復任爲后掎而止孫岳子武后時爲汝州司馬以辨治稱遷永州長史歷廬海等州刺史皆著風迹恩嚴兩施睿宗立召爲殿中少監授陝州刺史卒

唐臨唐書字本德長安人爲萬泉丞有輕囚久繫方春農事興臨說令可且出囚使就畝畝不許令移疾臨悉縱歸與之約囚如期還遷侍御史俄持節按獄交州出冤繫三

十人累遷大理卿高宗常錄囚餘司黷者輒紛訴不已
臨所訊無一言帝問故答曰唐卿斷囚不寃所以絕意帝
歎曰爲獄者固當如是永徽元年拜御史大夫累遷吏部
尚書坐免官起爲潮州刺史卒兄皎武德初爲秦王府記
室從王征討掌書檄貞觀中官吏部侍郎先選集四時補
擬不爲限皎請以冬初集盡季春止後遂爲法終益州長
史子之奇除蒼括令與徐敬業起兵伏誅

田仁會唐書長安人祖軌幽州刺史父宏陵州刺史仁會
擢制舉仕累左武侯中郎將永徽中爲平州刺史歲旱自
暴以祈雨大至穀遂登五遷勝州都督境有風賊依山剽
行人仁會發騎捕格夷之城門夜開道無寇跡入爲太府

少卿遷右金吾將軍晝夜循行有絲毫姦必發京師憚之
轉右衛將軍卒謚曰威

韋知人唐書韋奏傳字行哲叔謙子萬年人弱而好古以
國子舉授校書郎遷司庫員外郎卒子維繩維字文紀進
士對策高第擢武功主簿督役乾陵會歲饑均力勸功人
不知勞徙內江令教民耕桑縣爲刻頌遷戶部郎中終太
子庶子繩舉孝廉歷長安尉威行京師擢監察御史更泗
涇鄜三州刺史天寶初入爲秘書少監以善職稱終陳王
傳虛心字無逸維子舉孝廉遷大理丞侍御史神龍中按
大獄據正不撓景龍中屬羌叛旣禽捕有詔悉誅虛心惟
論酋長死原活其餘遷御史中丞歷荆潞揚三大都督府

長史以廬江多盜遂縣舒城盜賊爲衰入爲工部尙書東
京留守卒謚曰貞弟虛舟歷洪魏二州刺史有治名入爲
刑部侍郎

韓瑗唐書字伯玉仲良子少負節行貞觀中以兵部侍郎
襲爵永徽三年遷黃門侍郎進侍中兼太子賓客王后之
廢瑗雪泣言曰皇后乃陛下在藩時先帝所娶今無罪輒
廢非社稷計不納明日復諫帝大怒詔引出褚遂良貶潭
州瑗上言遂良受先帝顧託願寬無辜以順衆心帝不聽
瑗憂憤自表歸田里不報顯慶二年貶振州刺史卒自瑗
與遂良死內外以言爲諱將二十年

張仁愿唐書下邳人有文武材武后時累遷殿中侍御史

御史郭宏霸稱后乃彌勒佛身又鳳閣舍人張嘉福王慶之請以武承嗣爲皇太子邀仁愿聯章仁愿拒之後進左屯衛大將軍兼檢校洛州長史會穀貴多盜仁愿一切捕殺幾旬震懾無敢犯三年朔方軍總管沙吒忠義爲突厥所敗詔仁愿代之旣至賊已去引兵踵擊夜掩其營破之始朔方軍與突厥以河爲界北崖有拂雲祠突厥每犯邊必先謁祠禱解然後料兵度而南時默啜悉兵西擊仁愿請乘虛取漠南地於河北築三受降城絕虜南寇路中宗從之六旬而三城就又於牛頭朝那山北置烽候千三百所自是突厥不敢踰山牧馬朔方益無寇歲損費億計減鎮兵數萬初建三城也不置壘門或曰邊城無守備可平

仁愿曰兵貴攻取賤退守寇至當并力出拒何事守備退
怛其心景龍二年拜左衛大將軍睿宗立致仕卒贈太子
少保仁愿爲將按邊撫師賞罰必直功罪後人思之爲立
祠受降城出師輒享焉宰相文武兼者當時稱李靖郭元
振唐休璟仁愿云子之輔至趙州刺史

王孝傑唐書新豐人少以軍功進長壽元年爲武威道總
管克龜茲于闐疏勒碎葉等城武后曰貞觀中西境在四
鎮其後不善守棄之吐蕃今故土盡復孝傑功也進鳳閣
鸞臺三品契丹李盡忠等叛詔爲靖邊總管將兵討之軍
至東硤石谷與賊戰後軍不至爲虜所乘軍潰孝傑墮谷
死贈耿國公以其子無擇爲朝散大夫

王琳舊唐書字方慶周石泉公褒曾孫家咸陽父宏直爲漢王元昌友元昌畋獵無度上書切諫漸見疏斥轉荆王友龍朔中卒方慶年十六起家越王府參軍永淳中累遷太僕少卿則天臨朝拜廣州都督管內諸州首領舊多貪縱百姓詣府稱冤府官先受首領參劄未嘗鞠問方慶絕其交往首領縱暴者悉繩之境內清肅證聖元年召拜洛州長史萬歲登封元年遷鸞臺侍郎同平章事俄轉鳳閣侍郎則天幸玉泉寺以山徑危懸欲御腰輿而上方慶諫曰昔漢元帝常出便門御樓船光祿勳張猛諫曰乘船危就橋安元帝就橋今山徑危險石路曲狹比于樓船安危不等伏望停輿駐蹕則天納其言而止又舉令期功喪未

葬不預朝賀未終喪不預宴會比來朝官不遵禮法名教
旣虧實玷皇化伏望申明令式禁斷從之方慶以老疾乞
間乃授麟臺監修國史封石泉公卒謚曰貞方慶博學好
著述尤精三禮酬答咸有典據會昌一品集王石泉居相
時子爲眉州司士天后嘗問曰卿子何遠乎對曰廬陵是
陛下愛子今猶在遠臣之子焉敢相近唐書方慶孫備明
經辟范陽節度使張守珪幕府時契丹屈烈部將謀入寇
河北騷然備至虜中脅說禍福虜乃不入安祿山叛拜博
陵常山太守副河北招討使卒

竇孝謹舊唐書外戚傳刑部尙書誕之子昭成皇后父則
天時歷潤州刺史長壽二年后母龐氏被酷吏所陷誣與

后咒詛不道孝謹左遷羅州司馬卒子希城希球希瓘並流嶺南神龍初隨例雪免景雲年追贈孝謹太尉幽國公元宗卽位加贈太保希城等以舅氏甚見優寵希城累遷太子少傅幽國公尋卒希球官太子賓客封冀國公開元二十七年卒謚曰靖希瓘初賜爵畢國公後改名絬元宗以早失太后尤重外家絬兄弟三人皆國公食實封絬子鏐又尙元宗女永昌長公主而兄弟皆貪鄙過自封殖絬又甚之卒贈司徒絬從父弟維鑒好學以撰著爲業時宗族咸以外戚崇飾輿馬維鑒獨清儉自守官至水部郎中卒撰吉凶禮要二十卷行於世

李昭德唐書長安人父乾祐貞觀初爲殿中侍御史郇令

仁軌以輕罪置極刑非畫一之制由是免死母卒廬墓側
負土成墳帝遣使就弔表其間歷治書侍御史有能名免
官卒昭德強幹有父風擢明經累官鳳閣侍郎同平章事
武承嗣任文昌左相昭德諫曰承嗣已王不得典機衡以
惠衆庶乃罷洛陽人王慶之請以承嗣爲皇太子后遣昭
德詰其故昭德笞殺慶之奏曰自古有姪爲天子而爲姑
立廟乎陛下承天皇顧託而有天下又立承嗣臣見天皇
不來食矣后乃止有人獲洛水白石而赤文者獻闕下曰
此石赤心故以獻昭德叱曰洛水餘石豈盡能反邪時來
俊臣侯思止舞文法數誅陷大臣人皆懾懼昭德每奏其

誣罔不道狀卒榜殺思止其黨稍摧沮萬歲通天二年來
俊臣誣以逆謀旣而俊臣亦下獄同日誅衆庶莫不冤昭
德而快俊臣建德三年贈司空

田歸道唐書田仁會傳仁會子長安人明經及第累擢內
供奉左衛郎將突厥默啜請和武后詔將軍閻知微冊可
汗號默啜又遣使謝知微遇諸道卽與緋袍銀帝因表使
者卽到請備禮廷賜歸道諫曰知微擅賜使朝廷何以加
之宜敕初服須天子命后從之默啜將至單于都護府詔
歸道攝司賓卿往勞之默啜請六胡州及都護府地不得
執歸道將害之歸道辭色不撓爲陳禍福默啜悔以禮遣
歸道還具陳默啜不臣狀請備邊已而果反乃擢歸道

其官侍郎遷左金吾將軍押千騎宿衛元武門恒
二張歸道不豫聞及索騎士拒不應事平彥範欲誅之以
辭直免中宗壯其守召拜太僕少卿遷右金吾將軍卒謚
曰烈子賓庭開元時至光祿卿

韋安石唐書萬年人祖津陵州刺史父琬成州刺史安石
舉明經蘇良嗣薦於武后擢膳部員外郎遷并州司馬有
善政安石性方重政尙清嚴久視中遷文昌右丞時二張
及武三思寵橫安石數折辱之易之引蜀商博塞后前安
石奏商等賤類不當戲殿上后改容慰勉睿宗立復爲侍
中中書令太平公主有異謀欲引安石數邀之拒不徃帝
一日召安石曰朝廷傾心東宮卿胡不察曰太子仁孝天

下所稱且有大功陛下今安得亡國語此必太平公主計也主竊聞乃構飛變欲誅之賴郭元振保護免俄罷政事遷蒲州刺史大常卿姜皎有所請拒之皎奏安石護作定陵有盜沒詔籍其賊安石發憤卒天寶初贈左僕射郇國公謚文貞二子陟斌陟字殷卿累遷吏部侍郎楊國忠忌其才貶桂嶺尉徙平樂肅宗卽位永王兵起委陟招諭授江東節度使與高適來瑱會安州推瑒爲地主爲載書登壇辭旨慷慨永王敗除御史大夫拜吏部尙書卒謚忠孝斌父爲相時授太子通事舍人嚴峭有大臣體天寶中爲中書舍人祿山陷洛陽斌爲賊得憂憤卒贈秘書監

金龜唐書長安人在太常工籍睿宗爲皇嗣有誣異謀